

ԿԱՐԵՆ ՀՈՎՀԱՆՆԻՍՅԱՆ

ՀԱԻ

ՏՐԻՔՍՏԵՐԻ ԱՐԽԵՏԻՊԻ
ՎԱՅԱԿԱՆ ԴՐՍԵՎՈՐՈՒՄՆԵՐԸ

Ինչպես հայտնի է, արխետիպերը ստեղծում, խթանում եւ կարգավորում են ամբողջ մշակույթն ու մարդկային կենսաձեւերը¹: Արխետիպը չի «ճանաչում» ո՛չ տարածք, ո՛չ ժամանակ, ո՛չ էլ պատճառահետեւանքային տրամաբանություն, սակայն այն մարմնավորվում է էթնիկ մշակույթներին բնորոշ ձեւերում: Տրիքստերի կերպարը հանդես է գալիս նաեւ հայկական մշակույթի մի շարք բնագավառներում՝ առասպել, ծես, բանահյուսություն, կենցաղ, գրականություն եւ այլն:

Տրիքստերը որպես արխետիպ. Անկախ ժամանակակից քաղաքակրթությունից գերազանցապես դիրքորոշումից՝ մարդիկ այսօր, ինչպես եւ բոլոր ժամանակներում, հակված են հուզականություն: Տրիքստերը՝ իբրեւ արխետիպային կերպար, ունի բազմաթիվ դրսեւորումներ. նա բազմակողմանի է, ի հայտ է գալիս հակադիր ձեւերում, դրանով իսկ միանշանակ չէ: Կ. Գ. Յունգից հետո տրիքստերի կերպարով զբաղվել են տարբեր բնագավառների մի շարք մասնագետներ, որոնք առանձնացրել են տրիքստերին բնորոշ հատկանիշները²: Դրանցից առավել նշանակալիցներն են՝ անշահախնդիր խաղացող, հեղափոխական-ստեղծագործող (արարիչ, մշակութային հերոս, ընդունված կանոններին հակադրվող եւ նորերը ներդնող), խաբեբա (աճալարար, որտեղից է անունը՝ անգլ. *trickster*), խելառ (խելագար, խեղկատակ, նորմերը խախտող, անգամ հակահասարակական վարքի տեր), գոհ: Պակաս հատկանշական են, սակայն վերոհիշյալ հատկությունների հետ են հաճախ հանդես գալիս հետեւյալ որակները՝ գող, շա-

¹ C.-G. Jung, Theoretische Überlegungen zum Wesen des Psychischen, Grundwerke, Bd. 2, Olten und Freiburg, 1990, S. 69 (գերմաներենից թարգմանության համար խորին շնորհակալություն ենք հայտնում Լ. Միմոնյանին):

² Այդ աշխատությունների քննարկումը կարելի է գտնել՝ Լ. Արաքսիանյան, Տրիքստեր՝ հայտնի եւ անհայտ, Հայ ժողովրդական մշակույթ, XIV, Երեւան, 2007, էջ 5-9:

տակեր, արտաքնապես տգեղ, խեղանդամ: Այս հատկանիշներից շատերը կարող են բնորոշ լինել վառ արտահայտված տրիքստեր-պերսոնաժներին, մինչդեռ անշահախնդիր խաղը, հակադրությունը գործող կարգ ու կանոնին, ի վերջո, զոհ գնալը տրիքստերի համար պարտադիր գծեր են:

Տրիքստերի գործողությունները, որպես արարչագործության նմանակում, հաճախ լինում են զվարճալի եւ նույնիսկ զավեշտական: Թեեւ նա ո՛չ չար է, ո՛չ բարի, սակայն սարսափելի դաժանություն է ցուցաբերում իր անգիտակից լինելու եւ լքվածության պատճառով: Տրիքստերը արխարկ-նախնադարյան «տիեզերական» էակ է, որը գերազանցում է հասարակ մարդուն իր գերբնական հատկություններով, սակայն, մյուս կողմից՝ զիջում է մարդուն իր «անխելքության» եւ տարերայնության պատճառով, քանի որ նրա մեջ մարմնավորված է պայմանականություններից անդին անգիտակցականը: Տրիքստերը հավասար չէ կենդանուն, քանի որ չափազանց անօգնական է. նա չունի ինքնապահպանման բնագույն: Տրիքստերն ունի շրջապատին համակերպվող էություն, հակահասարակական էակ է, փոխարենը ավելի միտված է զարգացմանը՝ շնորհիվ հետաքրքրասիրության, գիտելիքների հանդեպ անհաղթահարելի ձգտման, որը միշտ ընդգծվում է առասպելներում³:

Տրիքստերները լինում են գերբնական էակներ, կենդանիներ կամ մարդիկ, երբեմն՝ երեքը միասին: Դրանից կախված՝ նրանք կարող են լինել իսկական արարիչներ կամ ծաղրանմանակողներ, կարող են մեռնել կամ ուղղակի պատվել, լինել հզոր կամ թույլ:

Տրիքստերը հաճախ տարօրինակ մարդ է, խելկատակ. նրան բոլորը հիմար են համարում, որի պատճառով նա ժամանակավորապես վայելում է անպատեհիությունը: Միաժամանակ նա իրականացնում է կապը վերին աշխարհի հետ եւ մասնակցում արարման գործընթացին⁴: Նա գերմարդ է. նրանից վախենում են եւ խուսափում, ընկերները լքում են նրան⁵: Հանճարի շնորհիվ նրան միառժամանակ թույլատրվում է այն, ինչն արգելված է մյուսներին, մինչեւ գալիս է նրան զոհաբերելու ժամանակը:

Տրիքստերի գերում կարող է հանդես գալ հին սերնդի աստվածությունը կամ աստվածությանը նմանակող էակը: Ըստ հայկական ավանդազրույցի՝ սատանան նախանձում է Աստծուն եւ ցանկանում է ինքն էլ արարել: Նա սովորեցնում է մարդկանց, բույսերին, կենդանիներին

³ К. Г. Юнг, Психология образа трикстера, К. Г. Юнг, Душа и миф: шесть архетипов, Киев, 1996, с. 347-348.

⁴ Լ. Միմոնյան, Արխետիպ. նոր հայացք հին տեսությանը, Երևան, 1998, էջ 6:

⁵ К. Г. Юнг, նշվ. աշխ., էջ 347:

ու քարերին՝ ինչպես կրակ ստանալ: Աստված զայրանալով ստեղծում է երկնային կրակը՝ կայծակը, որի հարվածից մարդիկ մեռնում են, իսկ սատանան փախչում է⁶: Այս առասպելում սատանան գործում է Պրոմեթեևսի նման, որը մարդկանց կրակ է պարգևեց: Պրոմեթեևսը եւս վառ արտահայտված տրիքստեր է⁷:

Հաճախ տրիքստերը գաճաճ է, կաղ, երբեմն՝ կուլյր, նաեւ խթոնիկ էակ է: Ասացվածքը վկայում է՝ «Ինչքան գետնի երեսին է, յոթ այդքան գետնի տակ է», այսինքն՝ գաճաճը սովորականից ցածրահասակ է, եւ դա ընկալվում է որպես խորամանկ, վտանգավոր լինելու նշան:

Տրիքստերի արխետիպը երբեմն այնքան ցայտուն է արտահայտվում, որ կերպարը, չլինելով տրիքստեր, չըջապատի կողմից, այնուամենայնիվ, ընկալվում է որպես այդպիսին: Կարելի է հիշել Քաջ Նազարին՝ ստախոս, պարծենկոտ ու վախկոտ, տիպիկ դիմակահանդեսային կերպար, որը բախտի բերմամբ դառնում է թագավոր: Հասարակութունը նրան վերագրում է տրիքստերի հատկություններ եւ հասցնում փառքի գագաթնակետին⁸: Նույն կերպ տրիքստերի որակներ են վերագրում Ե. Օտյանի «Կեղծ լրտեսը» պատմվածքի հերոսին՝ «մյուսյուլ ժաքին»: Որտեղ որ նա հայտնվում էր, բոլորը կարծում էին, թե ծպտյալ լրտես է՝ խաբում է, որ իմանա իրենց գաղտնիքները: «Մյուսյուլ ժաքը» սկսում է օգտվել այդ հանգամանքից⁹:

Տրիքստերը հսկայական րոնսածիսական համակարգում. Տրիքստերը ժողովրդի կողմից ամենասիրված արխետիպային կերպարներից է, ինչն արտահայտված է հայկական տոներում: Այսպես նա բարեկենդանյան ամենակարեւոր կերպարն է: Շահը, Խանը, Փաշան, էշ-պարոնը ավանակին նստած արքան է, որը միաժամանակ տրիքստեր-խեղկատակ եւ ծիսական հարկահավաք է: Նա դատում է, մահացած ձեւանում, ազատ ու սանձարձակ է պահում իրեն, նրան ծեծում եւ ծանակում են: Ի վերջո, Խանին զոհաբերում են. նրան նետում են ջուրը, այրում գլխարկը եւ այլն¹⁰: Փաշային զոհաբերում էին ագռավ, որը, ըստ Լ. Սիմոնյանի, նրա երկվորյակ-խորհրդանիշն էր¹¹, մինչդեռ մի շարք ժողովուրդների (օր.՝ Սիբիրի եւ

⁶ Ա. Ղանալանյան, Ավանդապատում, Երևան, 1969, թ. 905, էջ 410-411:

⁷ Р. Грейвс, Мифы древней Греции, Москва, 1992, с. 106-107.

⁸ «Ինչ քաջություն, ինչ խելք, ինչ հանճար. դատարկ բաներ են բոլորը. բանը մարդուս բախտն է»։ Հ. Թումանյան, Քաջ Նազարը, Երկերի ժողովածու, հ. 3, Երևան, 1969:

⁹ Ե. Օտյան, Կեղծ լրտեսը, Ընտիր երկեր, Երևան, 1988:

¹⁰ Լ. Սիմոնյան, Տոմարային ծիսաշար, հ. 2, Երևան, 2007, էջ 88, 90:

¹¹ Անդ, էջ 91:

Հյուսիսային Ամերիկայի բնիկների) առասպելաբանություն մեջ ագռավը ինքը տրիքստեր-հերոս է¹²:

Հայերի մեջ Բարեկենդանի փառայից¹³ բացի, կային նաեւ այլ՝ կես մարդ-կես կենդանի ծխական տրիքստերներ: Այսպիսին էր Բայազետի Քյոսա կելինը, որին կանդրադառնանք ստորեւ: Այսպիսին է նաեւ Բաղեշի քոշիկը (այծիկը), որին խաղացնում էին Մեծ Պաշքի առաջին օրը. «...տղայի մ'ետեւի ու առջեւի կողմէն մորթ կը կախեն, երեսը կ'ալլեն, գլուխը կը կապկպեն ու մէջքէն թուր մը ու թեւէն անեղ մը կը ձգեն. այս խրտուիլակին «քոշիկ» կ'ըսեն. թաղի բոլոր տները կը պտըտին ու կը խաղան քոշիկն ու իր ընկերները: Ամէն մի կատակախաղի մէջ քոշիկն կը մեռնի ու կը յառնէ...»¹⁴:

Տրիքստերը հայ առասպելաբանության մեջ. Այս համատեքստում շատ կարեւոր է Անանիա Շիրակացու հաղորդածը Վահագնի մասին. «...ոմանք յառաջնորդացն Հայոց ասացին՝ թէ խիստ ճմերանի Վահագն՝ նախնին Հայոց՝ գողացաւ գյարդն Բաղամայ (Բարշամի՝ Կ. Հ.) Ասոր-ւոց նախնոյն. գոր եւ մեք սովորեցաք բնախօսութեամբ Յարդգողի հետ անուանել»¹⁵: Այսպես է բացատրվում Ծիր կաթինի հայկական անվանումը՝ Հարդագողի ճանապարհ: Վահագնը՝ իբրեւ Հայոց նախնի եւ գողություն միջոցով տիեզերք գոյացնող¹⁶, կարող է ընկալվել որպես արարիչ: Համաձայն հայտնի առասպել-երգի՝ նա կապում է երեք աշխարհները՝ երկինքը, երկիրը եւ ծովը: Ինչպես նշեցինք՝ տրիքստերը միջնորդ է (ըստ Կ. Լեւի-Ստրասի՝ «մեդիատոր»), կապակցող, ինչպես եւ գող: Վահագնը նաեւ աստվածամարտիկ է, քանի որ գողանում է Բարշամի, Բաալ-Շամեմի (աքքադ.՝ «երկնքի տիրակալ») հարդը: Սակայն չկան տվյալներ նրա զոհաբերություն մասին: Կարելի է ենթադրել, որ Վահագնը տրիքստեր է մասամբ, ինչպես առհասարակ անմահները՝ դիցույթները:

¹² Е. Мелетинский, Ворон, “Мифологический словарь”, Москва, 1991, с. 130.

¹³ Վ. վրդ. Տէր-Մինասեան, Անգիր դպրութիւն եւ իին սովորութիւնք, Կ. Պոլիս, 1904, էջ 68-71:

¹⁴ «Գաւառական սովորոյթք, խոյլի գիւղ, Տարեկան սովորութիւններ», «Մապիս», Կ. Պոլիս, 1885, էջ 1020:

¹⁵ «Անանիայի Շիրակունոյ Մնացորդք բանից», Ս. Պետերբուրք, 1877, էջ 48:

¹⁶ Հայտնի է, որ հայոց մեջ մինչ օրս կենդանի են Հարդագողի ճանապարհի կամ Սանամոր իգի մասին բազմապիսի ավանդազրոյցներ: Դրանց դիտարկումը դուրս է տրիքստերի թեմայի սահմաններից, քանզի դրանք հաճախ ստանում են կանոնի, արգելքի խախտման բարոյագիտական մեկնաբանություն, իսկ գող-հերոսը չունի տրիքստերին հատուկ որակներ:

Հարդի գողություն մասին, այս անգամ Հայոց Տրդատ Գ. թագավորի կողմից, ուշագրավ հիշատակություն ունի Ագաթանգեղոսը: Գոթերի դեմ պատերազմելու համար Տրդատ արքան իր եւ հունական զորքերով գնում է Հունաց կայսեր մոտ: Նրանք կեսգիշերին հասնում են մի քաղաքի դարպասներին: Ձիերի համար հոր խոտ (դարման) չկար, իսկ պարսպից ներս խոտի դեզեր էին դրված: Տրդատը անցնում է պարսպի վրայով եւ խոտի դեզերը նետում զորքի կողմը: Հետագայում նա դառնում է կայսեր փոխանորդ, մարտնչում եւ հաղթում է գոթերի թագավորին¹⁷: Հարդագող Վահագնի եւ հարդագող Տրդատի զուգահեռ հուշում է, որ Վահագնի եղբայր Տիրանի ու Տրդատի անունների նմանությունը, թերեւս, պատահական չէ: Հարդագողը դիտվում է միաժամանակ որպես գերբնական հատկություններով օժտված էակ:

Առասպելներում եւ կենդանական հեքիաթներում հաճախ են հանդիպում կենդանի-տրիքստերները՝ ագռավ, կատու, կոյոտ եւ այլն: Սովորաբար նման կենդանիները տրիքստերի կերպարի մարմնավորման համար ընտրվում են իրենց բնական հատկությունների շնորհիվ. կատուն խաղասեր է, ագռավը՝ «չարածճի», այլ կենդանիներին եւ նույնիսկ մարդկանց խաբող: Կատուն, աղվեսն ու ագռավը նաեւ հմուտ գողեր են: Այս կենդանիներին միավորում է եւս մեկ հատկություն՝ ոչ խոտակեր են, ոչ գիշատիչ: Միջանկյալ դիրք գրավելով՝ ընկալվում են որպես «մեղիատորներ», այսինքն՝ ունեն տրիքստերին հատուկ միջնորդի որակ, հակասականություն, որն ունի հաղթահարման կարիք¹⁸: Ըստ Կ. Լեւի-Ստրոսի՝ հաղթահարման նպատակը երկվությունից ամբողջություն հասնելն է¹⁹:

Հայերի, ինչպես եւ շատ այլ ժողովուրդների մեջ, աղվեսը ժողովրդական հեքիաթների, կատակերգերի սիրելի կերպարներից է: Նա կարեւոր դեր է խաղում նաեւ հարսանյաց ծեսում: Բոլոր տեսակի արգելքները հաղթահարելով, ծեծի ենթարկվելով ու տուգանք վճարելով՝ նա հասնում է փեսայի տուն եւ, որպես բարի սուրհանդակ, հայտնում է հարսի ու հարսանեկան թափորի ճանապարհ ընկնելը²⁰:

Հարսանեկան սովորույթի զուգահեռն է «Աղվեսը, Գելը, Արջը եւ Զմրուկ-ղուշը» հեքիաթը²¹: Թագավորի տղան գնում-դառնում է ավազի՝

¹⁷ «Ագաթանգեղայ Պատմութիւն», Ա. Ղազար, Վենետիկ, 1862, էջ 45-49:

¹⁸ К. Леви-Строс, նշվ. աշխ., էջ 227:

¹⁹ Անդ, էջ 227-228:

²⁰ Տե՛ս Ա. Մնացականյան, Հայկական զարդարվեստ, Երևան, 1955, էջ 267-269. նաև՝ Բենսե, Բույանըյս, «Ազգագրական հանդէս», հ. Ե., Թիֆլիս, 1899, թ. 1, էջ 102:

²¹ «Հայ ժողովրդական հեքիաթներ» (այսուհետ՝ ՀԺՀ), հ. II, Երևան, 1959, Վաղարշապատ:

որսորդ: Նա իր որսի մի մասը աղ է դնում եւ պահում նկուղում: Մի տարի սով է լինում, աղվեսը գալիս, գտնում է միսը եւ գողանում: Տղան բռնում է նրան գողության պահին, բայց աղվեսը համոզում է չսպանել իրեն՝ խոստանալով օգտակար լինել: Հետո հերթով գալիս են Գելը, Արջը, Զմրութ-ղուշը, աղվեսը կերակրում է նրանց, ապա համոզում տղային՝ պահել այդ երեքին: Յոթ տարի հետո սովը վերջանում է. աղվեսը որոշում է ամուսնացնել թագավորի տղային Տրապիզոնի թագավորի աղջկա հետ: Կենդանիները Տրապիզոնում գութանով վար են անում եւ հորովել երգում: Երբ մարդիկ դուրս են գալիս «հրաշքը» տեսնելու, Զմրութ-ղուշը փախցնում է աղջկան եւ բերում տղայի մոտ: Աղվեսի հրամանով կենդանիները փախցնում, բերում են նաեւ «տերտերին», որը պսակում է երիտասարդներին: Այսպիսով՝ սյուժետային գրեթե ողջ հանգույցը կառուցվում է գողության եւ հարսանիքի շուրջ:

Հին հայկական ճեռագրերում եւս աղվեսի վերաբերյալ հետաքրքիր հիշատակություններ կան: Աղվեսը առնչվում է աճի եւ պտղաբերության հետ: Ի լրումն՝ նա հաճախ փոխակերպվում է գեղեցիկ աղջկա, մինչդեռ սեռափոխությունը բնորոշ է տրիքստերին: Այս հանգամանքները Ա. Մնացականյանին թույլ են տալիս եզրակացնել, որ աղվեսը եղել է հայերի նախնի-տոտեմներից մեկը²²: Դերսիմցիները եւս հավատում էին, որ աղվեսը դառնում է նոր հարս կամ գեռատի աղջիկ, երբեմն՝ հովիվ, փեսա եւ այլն: Դերսիմում հայերի եւ զազանների կողմից պաշտվում էին սրբազան աղվեսները, որոնք ապրում էին Ս. Հովհաննու փոքր մատուռի ժայռի ստորոտում՝ Աղվեսաբուն կոչված անցքում. նրանց սպանելը խստիվ արգելված էր²³:

Աղվես-տրիքստերի առնչությամբ հետաքրքիր է «Ոսկե քաքուլ տղի հեքիաթը»²⁴: Հերոսը երեք անգամ թույլ չի տալիս իր ընկեր Արաբին՝ սպանել Աղվեսին: Այդ բարության դիմաց Աղվեսն օգնում է տղային

²² Ա. Մնացականյան, նշվ. աշխ., էջ 264: Աղվեսի որոշակի պաշտամունք եղել է հայկական լեռնաշխարհում եւ կից տարածքներում: Սվանների պտղաբերության աստվածություն է Տուկեպիա Մելիան, որի անվան երկրորդ բաղադրիչը նշանակում է «աղվես».

III. Амиранишвили, История грузинского искусства, т. 1, Москва, 1950, էջ 32: Համարվում է, որ Տուկեպիա Մելիան խեթասուրարական Տեկեպիմուս աստվածության պաշտամունքի մնացուկ է: Թուեղյան մշակույթի մի գավաթի վրա ներկայացված է պտղաբերության հանդեսի խմբային տեսարան, որտեղ մարդիկ աղվեսի մորթիներով են (III. Амиранишвили, նշվ. աշխ., էջ 29-35, табл. 11), հեղինակը այն զուգահեռում է Դիոնիսի տոնի հետ՝ աղվեսի մորթի հագած մասնակիցներով:

²³ Գ. Հալաջյան, Դերսիմի հայերի ազգագրությունը, «Հայ ազգագրություն եւ բանահյուսություն», հ. 5, Երևան, 1973, էջ 163:

²⁴ ՀԺՀ, Այրարատ, հ. 1, Երևան, 1950:

փնտրել «Հրաշալի դուշին» եւ Պողոս ու Պետրոս քարացած եղբայրներին: Աղվեսի խորհրդով՝ տղան կտրոււմ է աղջկա հյուսը եւ բերում աղվեսին: Վարսերը դնելով՝ աղվեսը դառնում է աղջիկ՝ ճիշտ վարսերի տիրուհու նման: Աղվեսը քանիցս փոխում է իր կերպարանքը՝ օգնելով լուծել այս կամ այն խնդիրը:

Մարդիկ գնահատել են աղվեսի խելքն ու խորամանկութունը, ցանկացել նմանվել նրան. «Մարդիկ զիտհեմ եւ զհնարիմաց մարդն աղուէսու նմանեցուցանեն, զի ասեն ընդ խելօք մարդն, թէ իբրեւ զաղուէս ես դու»²⁵: Խելոք աղվեսի հանդեպ գործվալից վերաբերմունքի արտահայտութիւններէից են նրան նվիրված ժողովրդական երգերը:

Տրիքստերը հայկական ժողովրդական հեքիաթներում. Տրիքստերը բազմաթիվ կերպարներով է հանդես գալիս մի շարք ժողովուրդների հեքիաթներում՝ մարդ, կենդանի կամ գերբնական էակ՝ Կոշկավոր կատու, Աղվես, զանազան գաճաճներ եւ թզուկներ, հնարամիտ, «հունարով» գողեր եւ այլն: Հայկական հեքիաթներում եւ զվարճապատումներում տրիքստերը հաճախ հանդես է գալիս «Քաշիկ» կամ «Քյոսա» անվան տակ կամ որպէս հնարամիտ գող:

Հնարամիտ գողը կարողանում է թռցնել ամենաանհավանական, ամենագաղտնի պահված իրերը: «Իսաֆով գողը» հեքիաթում²⁶ գողի եղբորորդին երազում տեսնում եւ սիրահարվում է Ջին ու Մաշինի արքայազուտերը: Հարսնացուին գողանում է Ջհուգը: Իսաֆով գողը գողանում է սնունդ՝ քաղցած եղբորորդուն կերակրելու համար, դրամ՝ աղքատ պառավին օգնելու համար, հետո հարսնացուին՝ գող Ջհուգից. նա նաեւ առեւտուր է անում ու հասույթի կեսը բաժանում չքավորներին: Այստեղ առկա է անշահախնդրութեան մոտիվը. գողն իր ազնիվ կամ անազնիվ վաստակը կիսում է աղքատների հետ, այսինքն՝ ակնառու է տրիքստերի երկակիութունը՝ գող եւ բարերար միաժամանակ: Տղայի քաղցը խորհրդանշական է եւ համապատասխանում է հարսնացուից զրկվելուն, այսու գողը նրան բերում է ինչպէս սնունդ, այնպէս եւ հարսնացուին²⁷, երկուսն էլ՝ գողութեամբ:

«Գող տղի հեքիաթում»²⁸ Ջհուգի տղան խաբում է գողին, եւ վերջինս վրեժխնդիր է լինում նրանից. խաբեութեամբ տիրանում է Ջհուգի

²⁵ Ա. Մնացականյան, նշվ. աշխ., էջ 269. մեքքերումը՝ ձեռագիր թիվ 2379, Թ. 83ա:

²⁶ ՀԺՀ, Խլաթ, հ. XVI, Երևան, 2009:

²⁷ Հմմտ. սննդի եւ սնունդանության նույնությունը լիթիդոլի տեսակետից. К. Г. Юнг, Либидо, его метаморфозы и символы, Санкт-Петербург, 1994, էջ 141:

²⁸ ՀԺՀ, Լոռի, հ. VIII, Երևան, 1976:

տղայի ոսկե սինոն, երեք հազար ոսկուն, «մտնում է Զհուդի աղջկա ծոցը»՝ ամեն անգամ սպառնալով: Վերջապես Զհուդի տղայի եւ թագավորի աղջկա հարսանիքի ժամանակ նա հագնում է հարսի ընկերուհու զգեստը եւ խաբեությամբ կախաղան հանել է տալիս տղային: Այս ամենից հետո Զհուդը հեռանում է քաղաքից. երբ պետք է անցներ ծովը, գողը հափշտակում է նրա ողջ կարողությունը, որի հետեւանքով Զհուդը մահանում է:

Հեքիաթի երկրորդ մասում հարեւան թագավորը կշտամբում է գողի քաղաքի թագավորին, որ վերջինս չի կարողանում գողին բռնել: Գողը, հագնելով աղջկա զգեստ, խայտառակ է անում հարեւան թագավորին: Երկու թագավորները համաձայնում են գողին ամուսնացնել արքայադստեր հետ, որին արդեն առեւանգել էին տարաբախտ Զհուդի որդուց: Այսպես՝ երկու անգամ առկա է սեռափոխություն, եւ գողությունն ու հարսանիքը սերտորեն փոխկապակցված են. երկրորդ մասը կարելի է դիտարկել որպես հարսանեկան փորձություն:

Տրիքստերը հայկական զվարճապատումներում. Տրիքստերը ժողովրդական բազմաթիվ զրույցների, անեկդոտների սիրելի հերոսն է:

Հայոց մեջ տարածված են եղել արեւելյան զվարճապատումներ այնպիսի հերոսների մասին, ինչպիսիք են Դիվանա Բահլուլը կամ Խոջա Նասրեդդինը: Խ. Աբովյանն իր «Պարապ վախտի խաղալիք» ժողովածուում գետեղել է նաեւ Մուլլա Նասրեդդինի մասին հայկական զրույցները²⁹:

Շատ դեպքերում տրիքստեր-կերպարները իրական մարդիկ են: Գրեթե ամեն գավառ ուներ իր տրիքստեր-հերոսը. Ղարաբաղում Պըլը-Պուդին է, Լոռիում՝ երբեմն «չաչ», բայց եւ խաբող ու խաբվող Հոբոսը³⁰, կատակասեր Ռուբենը, Շիրակում՝ հնարամիտ Պոլոզ Մուկուհը³¹, Արեւմտյան Հայաստանում՝ Խելոք Դավիթը, որոնց մասին զրույցները եւ անեկդոտներն ունեն նույն կառուցվածքը, ինչը որ՝ օտար ազգերի տրիքստերների մասին սյուժեները: Այս բոլոր կերպարներում միավորվում են ծայրահեղ հակասությունները՝ խելքն ու հիմարությունը, դաժանությունը եւ մարդասիրությունը:

Երզնկայում, Դերջանում, Կամախում եւ ավելի հեռավոր վայրերում շատ սիրված էր Քել օղլանը: Նրան Քել էին անվանում ճաղատության պատճառով: Նա խորամանկ էր, խաբեբա, շատ խելացի, դաժան կատակ-

²⁹ Ա. Սարգսյան, Լոռու երգիծական մանրապատումները, «Հայ ժողովրդական մշակույթ XV», Երևան, 2010, էջ 507:

³⁰ Ա. Ղանալանյան, նշվ. աշխ., էջ ԻԱ.:

³¹ Հ. Իկիլիկյան, Գյումրին, Պոլոզ Մուկուհը եւ երգիծական մանրապատումները, Երևան, 1969, էջ ԻԱ.:

ներ էր խաղում մոլլայի, թուրք աղայի հետ, նույնիսկ «թագավոր» է անվանվում³²:

Քաչիլիկը հայկական ժողովրդական բազմաթիվ հեքիաթների հերոս է: Որոշ հեքիաթներում տրվում է նրա նկարագիրը՝ ճաղատ, կարճահասակ, թխամորթ, անշնորհք տղա, փնթի, երեսը կեղտոտ, քիթը կախ ընկած: Երբեմն նա հանդես է գալիս որպես բացասական կերպար՝ խանգարում է հերոսին: Ավելի տարածված է, սակայն, Քաչիլիկի խորամանկ, խաղասեր, հաղթանակող կերպարը:

«Չար Քոսեն» հեքիաթում³³ տրիքստեր-հերոսը չար ու դաժան կատակներ է անում Գելի, Ռեսի տղայի հետ, խաբում հարսին ու փեսային, խաբելով՝ խմում քրդի գինին, հետո ծեծել տալիս նրան: Ռեսի տղան իր կորցրած երկու հարյուր ոչխարի փոխարեն սպառնում է տանել Քոսի կնոջը: Քոսեն հագնում է կնոջ զգեստները եւ նստում ճախարակ մանելու. երբ Ռեսի տղան կնոջ փոխարեն նրան է տանում, վերջինս գիշերը փախչում է:

Քոսայի ծխական զուգահեռն է Բայազետի Ս. Սարգսի տոնի խեղկատակ Քոսա կելինը: Նա այծի մորուքով, ցնցոտիներով, մրոտ երեսով մարդուկ էր՝ ձեռքին խաղք (շխկշխկան խաղալիք), եւ ծամածռություններով գնում էր դռնեդռու: Ամեն դռան առջեւ նրա շքախմբի դիմակավոր հարսները պարում էին, իսկ նա հավաքում էր նվիրատվությունները. դա պարտադիր էր բոլոր տների համար³⁴:

Տրիքստերը հսկայականություն մեջ. Հայ գրականության մեջ տրիքստերի կերպարը թույլ է արտահայտված: Հ. Պարոնյանի որոշ հերոսներ ունեն տրիքստերի հատկություններ: Որոշակի վերապահումով՝ տրիքստեր է Գ. Սունդուկյանի «Պեպո» պիեսի հերոս Կակուլին: Վառ արտահայտված տրիքստեր է Գ. Զոհրապի հերոս գող Զաբուղոն: Նրա մեծագույն արժանիքը ճարպկությունն է: Ամեն բան գիտի, բոլոր դռները կարող է բացել, ոչ մի արգելք գոյություն չունի նրա համար: Նրան դավաճանում եւ բռնել է տալիս (տրիքստերի զոհաբերություն) իր սիրելին՝ Վասիլիկը: Զաբուղոն վեցերորդ փորձից կարողանում է փախչել բանտից, սակայն վերջին պահին չի կարողանում սպանել սիրահարներին՝ Վասիլիկին ու նրա սիրեցյալին, եւ ինքնակամ վերադառնում է բանտ:

³² Գ. Ստեփանյան, Երզնկա, Երևան, 2005, էջ 450: Հեղինակը գրի է առել Քելի մասին երկու հեքիաթ՝ «Քել օղյանն ու մոլլան», «Քել օղյանն ու թուրք աղան», իսկ մեկ այլ հեքիաթ, որը ներկայացված չէ, կոչվում է «Քել օղյանը թագավոր»:

³³ ՀԺՀ, Բուլանքլու-Խյաթ, հ. XVI, Երևան, 2009:

³⁴ Վ. վրդ. Տէր-Միսասեան, նշվ. աշխ., էջ 54:

Եզրակացնելով այս հակիրճ ակնարկը՝ նշենք, որ տրիքստերը հայկական տոնածիսական համակարգի կարեւոր կերպարներից է, բավականին հաճախ ի հայտ է գալիս հայկական առասպելաբանության մեջ, հեքիաթներում, զվարճապատումներում, ավելի քիչ՝ գրականության մեջ: Որպես միջնորդ տրիքստերն ապահովում է տարատեսակ «աշխարհների» ներդաշնակ կապը:

РЕЗИОМЕ

В армянской культуре архетип трикстера воплощается в Ваагне и в воре сена Трдате, в свадебном и сказочном лисе, в ловком воре и в других героях - мошенниках и умниках. Наиболее целостно трикстер проявляется в карнавальных шутах - героях сказок и обрядов, таких как Хан-Паша, Кеса-Качлик (плешивый), кошик (козел), вор Лис. Армянские трикстеры в большинстве связаны так же со свадебным обрядом, что является их этнической особенностью. Это медиаторы между жизнью и смертью, между двумя разными мирами, которые они соединяют в целостно-диалектический цикл.

SUMMARY

The trickster archetype is incorporated into the Armenian culture in such personages as Vahagn and the king Tiridates as straw stealer, as matrimonial and fairy-tale Fox, sophisticated thief and other deceiver, swindler and smart heroes. The most important figures of the trickster can be met in the carnival: jester-like heroes as Pasha (the Carnival King), Kyosa-Kachlik (bald), koshik-goat, the thief-Fox. Armenian tricksters mostly are connected with the matrimonial ceremony, and that is their ethnic peculiarity. They are mediums between the life and death, two different worlds, which they connect to each other in a dialectical circle.

